

# 2 Timoti

## Pas yimbu Por ai Timotimbo sürü papımarandi

---

### Por ai Timotimbo pas sürü papımarandi

**1** <sup>1</sup>Ro Por-anahi. God ai ahandıhoari Sisas Kraisindi hoafi semindi horambo kamafoareandiri. God ai wambo nindou Sisas Kraisimbo anihondümbo-rihinda yangiri koadürü niŋgoweimbi saimbo horombo hoafimareandi ranahambo wataporımboyo-rambohünda koamarihendiri. <sup>2</sup>Timoti, se wandı nimori hondü nahurai-anafi, ro sihambo pas nda sürü paparihandi. Ape God asu sihefi Adükari Sisas Krais ai sihambo aboedi hohoanimo-ndınaninühi hipoambo-ndineanına ŋgusüfoambe afure kumbearo-amboane.

### Sihiri yowani aboedi hoafi hoafimbo amoanıŋgi-yopoani

<sup>3</sup>Ro Godindi himboahü hüti-koate ahandi ratüpuri ratüpuriya arihandi wandı amoao mami amboani rani-süŋguarihindi nou. Ro sirihi asu nimbokoani sihambo hohoanimo-yahaninühi Godimbo hihifirihünühi didıbafi-yaheando arihandi. <sup>4</sup>Asu se wambohünda aranımayafi ranimbo hohoanimoyahaninühi ro sihambo hoeifeninimbo afındi hohoanimoayahi. Ro asükai hoeindiheaninühi rananimbo hihifi-hihifi-ndamboyahi. <sup>5</sup>Ro sihafi Kraisimbo anihondümbofoe hondü ranahambo asükai hohoanimoayahi. Sihafi asari Rois asu sihafi me Yunis ai weyangurühi anihondümborine marinandi, ŋga ro yarihe anihondümbo-ariheandi sihafi anihondümbofoe hohoanimo amboa ahafe nahurai-ane. <sup>6</sup>Ranimbo-hündamboane sihafi hohoanimo botariheanini. Ro wandı wari sihafi mbırowami manandıheandi ra God ai sihambo rani-poanimbo ŋginindi masaganini. Ranimbo sihafi ŋginindi ranai hai pipirowanda ahoro nahuraimbeyowa sahehea. <sup>7</sup>Sapo God ai sihefimbo Yifiafi masemuni ra yihimbo saiyamuni-randeimbi-yopoani,

nga wani. Yifiafi ranana sihefimbo ngingemindimunani nindou ngorumbo ngusüfo pefe asu sihefi hohoanimo ndofe hifandimboyo hohoanimo ra masemuni. <sup>8</sup>Ranimbo-hündamboane se sihefi Adükarindi hoafi hoafimbo amoaningi-ndamboyafi. Asu se wambo amoaningi-ndamboyafi, nga ro ahandi ratüpuri-mbohünda karabusi-meheand-ane. Nga se Godindimayo ngingindi raninambo Aboedi hoafi bokari-hefembohünda ro-dibo tinjirifondemboane. God ai ranimbo-hündamboyo ngingindi sayamuni arandi. <sup>9</sup>Asu ai aboedamboreamuni mbura ahandi sürühoeimbi nindoumbore kafoare hiningimareamuni. Ai ramareandi ra sihiri aboedi hohoanimo-mayefamboyopani, nga wani. Nga ranana horombo hondü God ai hifi sünü nafi-koateyu-ambeyo Kraisindi süngu aboedi hohoanimo-memuna ahandi nindoumboyahu tükümehundi. <sup>10</sup>Nga asu hapondani ana Sisas Krais sihefimbo aboedambo-reamuneimbi ranai ndeara weindahi tüküfimboani. Asu ahandi ratüpuri süngu Godindi nindoumbo aboedi hohoanimo amboani weindahi tüküfemboane. Sisas Krais ai yifindi ngingindi hifinambo-mareanda yifi ai ngingindikoate-ane. Asu ahandi aboedi hoafi raninambo muŋguambo nindou ai yifikoate yanggiri koadürümbo-koadürümbo ningombo ra weindahi-mareandi.

<sup>11</sup>Ai wambo kamafoareandiri aboedi hoafi wataporimboyo, Kraisindi hoafi semindi ho, asu nindoumbo Godindi hohoanimo yamundife raraombohünda. <sup>12</sup>Ro tinjirifo asahamindihi aboedi hoafi hoafiya arihandi ranimbo-hünda, nga ranahambo ro moai amoaningiyahi. Sapo ro Nindou anihondümbo-arihini ahambo fifirihini. Asu ro fifiriheandi ai wambo rani ratüpuri masendi ra hibada ngumbo Sisasindi adükari si ra tükündifemboe.

<sup>13</sup>Ro yamundi-mariheandi himborimayafi ra aboedi sisami nahurai-ane asu se mami yahurai nindoumbo yamundowandüri ndandi. Ranimboane se Sisas Kraisimbo anihondümbo-ndiworühi ngusüfo pandoworühi asu rani-hoafi yamundo ndandi. <sup>14</sup>God ai aboedi hoafi sihafi warihümareandi ra aboedi moatükun-ane, nga se wudipoapondo hibadandi. Yifiafi Aboedi sihefi fiambe amaro ranai fandiheninimboe rani ratüpuri ra hifandimbohünda.

<sup>15</sup>Se fifirowandi muŋguambo nindou Esia hifihünda ai wambo hiningi-marihindiri. Asu Figerus weimbo Hemogenes amboani hiningi-marineandiri.

<sup>16</sup>Ro didibafeheandi Adükari ai Onesiforus ahandi aborüdi babidimbo hipoambo-mbireandür-amboane. Ai wambo karabusambe-ani yahu amoaningikoate süni hoeireandiri randani ngusüfo aboedi kürihe mamarihi. <sup>17</sup>Ai süfumbo Romohü wambo tinjirifoyuhü kokorandirimbo asu sünguna hoeimareandiri. <sup>18</sup>Ro didibafeheandi Adükari ai Godindi yibobofe si tüküfe simboani hipoambo-mbirir-amboane. Se fifirowandi Onesiforus ai ro Efesusihü karabusiyaha nimarihambe wambo fehefendirimbohünda afindi ratüpuri ratüpuriyu marandi.

**Timoti ai Kraisindi ratüpuri wudipoaponde ratüpurimbiyu-wamboane**

**2** <sup>1</sup>Asu wandi nimori Timoti, muŋguambo si Sisasindi-mayo aboedi hohoanimo ranai sihambo ŋginimbi-ramindinin-amboane. <sup>2</sup>Asu yamundife hoafi ro nindou afindi-yei himboahü wataporimbo-marihandi ra se himborimayafi. Rani hoafi ra nindou Godindi hoafi anihondümbo kikihi-ründimondeimbi ahamundi warihündowapuri. Rananimbo asu ai asüakai nindou bidifirambo yamundi-mbirundür-amboane.

<sup>3</sup>Se Sisas Krisindi ami aboedi nahuraimbondafu nimbafi. Rananimbo se ro-dibo tiŋirifo ra ndahoaminde-mboane. <sup>4</sup>Se ami-yomondi ratüpuri fifirowandi, sapo ai amimboyafu ratüpurayomo ra ŋgiri ŋgorü ratüpuri ndowandümo, ŋga wani. Aiana moani ami ratüpuri rani yanggiri ratüpuri-ndimondani ahamundi bogori ai ahamundi ratüpuri ranahambo aboed-ane mbeyahua mbisimo hou rani yanggiri ratüpuri-ndimboemo. <sup>5</sup>Asu nindou ai napo semindimbo pipi ranambe pipayu ana, pipi ranahandi ahini ra süngundeandi. Ai ra süngufekoate-ayu ana, ai pipimayu ranahambo napo semindimboayu amboani ŋgiri ndemüdu. <sup>6</sup>Nindou nümbürambe manggiri hifireandühi tiŋirifoayu ai-boatei bidifiri sesi ra yimuŋguri-mbiramüdu-wamboane. <sup>7</sup>Hoafi nda ro hoafimayahimbo se hohoanimondafi, ŋga Adükari ai sihafi hohoanimoambe horindea-ninimbui. Asu rananimbo se hoafi ranahandi nimindi ra wudipoapondo fifirindo-wamboyafi.

<sup>8</sup>Se hohoanimondafi fifirindowandi Sisas Krais yifihündi botimefiyu ranana Defit, Israeri-yafe adükari bogorindi srambeahind-ani. Ranimboane aboedi hoafi ro wataporimbo-arihandi ranahambo hoafayahi. <sup>9</sup>Ro aboedi hoafi hoafiya marihandi ranimboyo nindou ai wambo moaruwai nindou-ani yahomo houmbo mamikarambo tiŋirifo saundiri mburümbo karabusi-marundiri. Ŋga Godindi hoafi ranana ŋgiri karabusindifeyo. <sup>10</sup>Ranimbo-hündamboane ro hohoanimo ŋginindi küriheandühi muŋguambo tiŋirifo ra asahamindihi nindou God ai wand-anei yahundüreimbi ranaheimbo fehefe-ndürimbohünda. Ranimboanahi ai-amboani Sisas Krais ai aheimbo aboedambo-ndeandüra ai-dibo koadürümbo-koadürümbo himboamupuimbo-randeimbi kapeihü mbinimboeia sahehea hohoanimoayahi. <sup>11</sup>Sihiri hoafi nda anihondümbo-ndihumboane:

Sihiri ai-dibo yifayefi ana,  
asüakai sihiri ai-dibo yanggiri nimboemboyefi.

<sup>12</sup> Sihiri ai-dibo tiŋirifo asahumindefi ana,  
asu sihiri ai-babidimbo bogorimbondahu hibadihumboyefi.

Ŋga asu sihiri ahambo daboadi hihirarihuri ana,  
ai sihefimbo daboadi hihirindi-ndeamunümbui.

<sup>13</sup> Sihiri ahambo süngufimbo hoafiyefi mburihumbo

asu süngufekoate-ayefi anasi,  
 asu aiana ahandi hoafimayu ra süngundeambui.  
 Aiana ngiri ahandi hohoanimo ra ngorü-süngundeandi, nga wani.

**Timoti ai Godindi ratüpuriyombo tiñirifombiyu-wamboane**

<sup>14</sup>Se nimorehi nindowenihi ranaheimbo rani hoafi ranahambo hoafindafindüri nda ngafi. Asu Godindi himboahü se aheimbo ahini hoafindafindüri ai ngiri hifinindi moatükuni ranahambo hoafinambo simbori-simborindei. Rani-moatükuni ranana nindoumbo famandiheiri-poani, nga nindou himborayei ranaheimbo moaruwaimbo-ndearümboe.

<sup>15</sup>Se Godindi ratüpuriyo-randeimbi nindoumbofe tüküfembo tiñirifondafi, rananimbo God ai sihafi ratüpuri ra aboed-ane yahombohünda. Rananimbo se Godindi ratüpuriyafi-randeimbi amoanngikoate-ndafühi ahandi hoafi wudipoapondo yamundo-wandürimboyafi. <sup>16</sup>Se Godindi hohoanimo süngufekoate hoafi rani-fikimi ngamboayafi, nga yowani. Sapo hoafi moaruwai ranai ana nindoumbo Godindi süngufe anguni ndemindindüri ngomböe. <sup>17</sup>Sapo hoafi ranana masime moaruwai hamindi adükari tükefeyo nahurai-ane, nga rananimbo nindoumbo moaruwaimbo-ndeamboe. Sapo Himeneus weimbo Firetus rawefine marinandi nou. <sup>18</sup>Nindou rahurai aiana hoafi hondü ra hiniñgirineambo anafandi, sapo ai hoafiyafandühi safaniya, 'Sihiri ana yifihündi botimayahundane, ranimbo wambo asu ngiri sünguna yifihündi botindahundi,' safani arinandi. Ranane hoafi ranai bodimondi-yafe Godimbo anihondümbofe hohoanimo ra moaruwaimbo-reandüri arandi.

<sup>19</sup>God ai Kraisindi nendi nginemindimbo-hünda Krai kambohoani nahurai mafondiri. Kambohoani ranifihü sürü nda apeniñgo: 'Adükari ai ahandi nendambo ndore fifirea-ndürimboani.' Asu ngorü sürü amboani nda 'Muñguambo nindou ai seiya, "Ro Adükariñd-aneñi," asei ranai ana moaruwai hohoanimo ranahambo daboadi hihiri-mbiriñhind-amboane.'

<sup>20</sup>Adükari worambe gor asu sirfa raninambo hipiri nafirühi masihehindi. Gor sirfa raninambo yanggiriyo poani, nga nimi asu hifi raninambo amboani nafimarihündi. Rani-moatükuni ra bidifiri rani-poanambo ratüpuriñboyoy asu bidifiri mamikarambo moatükuni ratüpuriñboyoy. <sup>21</sup>Ranimboane nindou düdi ai rani mamikarambo hohoanimo ra hiniñgireandühi Godindi himboahü aboedayu ana, ai rani-poanimbo ratüpuriñboyoy hipiri nahurai nüñgumbui. Ai Adükariñdi yanggiri nüñguhü asu ahambo fandiheirühi aboedi ratüpuriñboyoy yanggiri nafiramindi niñgo marand-ane.

<sup>22</sup>Ngga ranimboane se nindou hoarifambori-yafe moaruwai hohoanimo ranahambo feboawandi. Ngga se mbumundi hohoanimo, Godimbo anihondümbofe hohoanimo, ngusüfo pefe hohoanimo, ngusüfo afurife

kife hohoanimo, rani hohoanimo-animbo ndowandifi. Nindou didiyei Godindi himboahü sürühehi-ndeimbiyei asu Adükarindi ndürinambo didibafiyahi arihündi ai se-babidimbo rani hohoanimo süngundihindi. <sup>23</sup>Asu se nindou ngusüfo hohoanimokoate hoafi ngorü-süngu ngorü-süngu-rihündeimbi ranahei fikimi ngamboyafi, nga yowani. Iga se fifirowandi hoafi yahurai ranana hoafinambo simbori-simborei tüküfe randühane. <sup>24</sup>Asu Adükarindi ratüpuriyu-randeimbi ana ngiri hoafinambo simbori-simborei, nga wani. Iga ai nindou munguambo afure hohoanimoyuhü ndore yamunde-randeimbiyu haya himboari-yanngiri hifandi-randeimbimbiyu-wamboane. <sup>25</sup>Adükarindi ratüpuriyu-randeimbi ai himboari hoafendinduhü, nindou mami hohoanimo süngufekoate-yeimbi ranaheimbo yamundeandüri. Rananimo God ai ahei ngusüfoambe hihirareandüri ana, anihondü yamundife hoafi ra himborei-ndeimboyei. <sup>26</sup>Nindou yahurai ranana Satan ai aheimbo ahandi andürambe masemündündüri ahandi hoafi süngufembohünda. Iga ai hoafi hondü ra fifirarihindi ana, Satanindi andüri ra hinngirihi moanambühi aboedambo tükündahimboyei.

**Bidifiranambo si tüküfeyoambe ana nindou ai moaruwai hohoanimo-ndeimboyei**

**3** <sup>1</sup>Se fifirihindi bidifiranambo si akimi tüküfembo-yoambe ana tinngirifo afindi tükündifemboe. <sup>2</sup>Nimboe sapo nindou ai ahei fimbo yanngiri hohoanimondeihi, kakimbo yanngiri hohoanimo pandihimboyei. Ai ahei fimbo yanngiri borindeihi asu ngorü nindou hohoanimo-koatendeihi nindou bodimondambo tirifoefe hoafindeihi, ngiri ahei boagiri-yei hoafi himborei ndühündi. Igi nindou ranaheimbo hihifindihündüri asu ai Godindi hohoanimo süngufekoate-ndeimboyei. <sup>3</sup>Ai ngiri nindou bodimondambo hohoanimondei asu ngiri nindou amboawiyeyi mbisei. Iga ai daboarani nindou ngorumbo amonngoni hoafindeimboyei, asu ngiri ahei fi wudipoapondihi hibadühündi, nga ai hipoambofe-koatendeihi nine aboedayo ra moaruwaimbo-ndihimboyei. <sup>4</sup>Asu ai ahei ngunindambo amboani hohoanimo-koatendeihi moaruwai moatükuni randihimboyei. Ai hohoanimoyo hoiefekoate ratüpuri-ndeimboyei. Ai hohoanimo-ndeihya, roana bogori nindou-anehi mbisei hehi Godimbo hohoanimokoate hifi ndanihündambo hihifi-hihifi hohoanimo yanngiri hohoanimo-ndeimboyei. <sup>5</sup>Ai Godindi hoafi ra fi yanngiri süngundi-himboyei, nga ahandi nginindi adükari engoro ra ngiri fifirindhindi. Se nindou yahurai ranahei fikimi ho-poani, nga yowani.

<sup>6</sup>Nindou yahurai aiana nimorehi hihindi hohoanimoyeimbi moaruwai hohoanimoyeyi arihündi ranahei worinambo ho ahei hohoanimo ngorü-süngufe hifandimbo ranimboane nafi kokoarundi. Moaruwai hohoanimo ai ahei ngusüfambe botireandüra rani hohoanimo ra refembo hohoanimoyeyi

arihündi. <sup>7</sup>Asu nimorehi ranai simbori yamundife sahümündi arihündi, nga ai ngiri Godindi anihondü hohoanimo ra fifirindihindi. <sup>8</sup>Horombo Sanes weimbo Sambres ai Mosesindi hoafi daboadi hihirima-rineandi rani-sungumboane hapondani amboani anihondü hoafi ranahambo daboadi hihirarundi. Ranane ahamundi hohoanimo ranai mamikari-yomondühi asu ahamundi Godimbo hohoanimo ra moanane. <sup>9</sup>Ŋga ahei rani hohoanimo ra ngiri adükari tükündifeyo, nga wani. Muŋguambo nindou ai hoeindihindani ahamundi hohoanimo ai mamikari-ndapurimboe sapo horombo Sanes weimbo Sambres ramefineandi nou.

**Timoti ai Godindi hoafi nginindi kikihimbi-ramüdu-wamboane**

<sup>10</sup>Ŋga seana wandi yamundife, hahabodi marihandi asu wandi hoahoango ranahandi nimindi ra fifirowandühi sungumarowandi. Ro Godimbo anihondumbo-rihinühi ngorü nindoumbo afurihe hohoanimo-yahandüri asu nindoumbo ngusüfo pariheandürühi tiŋirifo tüküfeyowani moanane sa nginindi nimboa marihandi ra se fifirowandi. <sup>11</sup>Sapo ro Andiok, Aikoniam asu Ristra ngoafihü nindou ai wambo moaruwaimbo-rihindirühi asübusi masehündi ra se fifirowandi. Ro rani ngoafihü tiŋirifo masahamindihiyosi, nga Adükari ai famarihendira aboedambo animboahi. <sup>12</sup>Anihond-ane, muŋguambo nindou Sisas Kraisi dibo nimboadeimbo Godindi hohoanimo sunguarihindi ana, nindou ai aheimbo moaruwaimbo-ndihindürimboeyi. <sup>13</sup>Ŋga nindou moaruwai Godindi hoafi fi yangiri sungurundeimbi ahamundi hohoanimo ranai ngo-ngombo moaruwai hamindindimboe. Ai nindou bidifiri-yei hohoanimo mamikari-rundürüh-anemo, nga asu ahamundi hohoanimo amboani mamikararapuri.

<sup>14</sup>Ro sihambo hoafehanini, se hoafi himboriyafi mbura anihondümborowandi rani yangiri sungundo ngafi. Hoafi ra anihond-ane, sapo nindou düdi sihambo yamundi-marihinini ranaheimbo wudipoaporo fifirowandüri. <sup>15</sup>Asu se fifirowandi sapo se nimori akidouyafambe hafimbo sihambo hohoanimo aboedi saimbo Godindi hohoanimo pairoweimbi buk rani-boatei fifirimarowandi. Buk rananimbo hohoanimo aboedi daganinani Sisas Kraisimbo anihondumbo-ndiworani asu God ai sihambo aboedambo-ndeaninimbui. <sup>16</sup>God ahandi bukambe hoafi ra weindahi-mareandi. Asu yamundifembo, moaruwai hohoanimo nafuimbo, hohoanimo didiboado-fembo asu mbumundi hohoanimo sungufembo yamundife-mbohündambo hoafi ra aboed-ane. <sup>17</sup>Rananimbo nindou didiyei Godindi hohoanimo sunguarihindi ranai aboedi ratüpuri ratüpuri-mbohünda ndorühi fifirihimboanei.

**Timoti ai Godindi hoafi hoafimbo nginindi mbinüŋgu-wamboane**

**4** <sup>1</sup>Sisas Kraisi ai weindahi kuduani asu ahandi nginindi hifandarandi ra tükündifeyoani ai yangiri niboadeimbi asu yifiyeimbi ra

yibobondearümbui. Ahandi asu Godindi himboahü ndanahambo sihambo ahini hoafehanini. <sup>2</sup>Se aboedi hoafi ra bokarihefembo nginindi nimbafi. Nindou ai himborindeianiyo asu wanindoaniyo ra se bokandihao ndandi. Nindou ai ahei hohoanimimo moaruwai hoeifembohünda hoafindafindüri. Ai moaruwai hohoanimimo-ndeiani se nginindi hoafindafindüri. Ahei ngusüfoambe kikimo-boadowandüri. Hiniñgirou hoafindafindürühi wudipoapondo yamundowandüri. <sup>3</sup>Himboriyafi, süngunambo ana nindou ai hoafi hondü ranahambo himborikoate-ndeimboyei. Rananimbo ai nindou afindi aheimbo yamundife-ndürimbo kokondihü-purimboyei nini hoafiyo ai himborimbo hohoanimoyeimbi ra yamundife-ndürimbohünda. <sup>4</sup>Ranimbo hoafi hondü ra hiniñgindihi hehi moani hoafi yanggiri ra süngundihimboyei. <sup>5</sup>Iga se muñguambo si wudipoapondo hohoanimondafi se tiñirifo ndowandifi asu nindoumbo aboedi hoafi ra wataporimbo-ndandüri. Asu Godindi ratüpuri ra se anihondümbo hamindi ratüpurindafi.

### Por yifimbo akim-ani

<sup>6</sup>Wandi yanggiri niñgo ra Godimbo sesi saimbo nahurai-ane, nga ndeara wandi yifimbo ra akim-ane. <sup>7</sup>Ro aboedi hamindi yifiariya, yanggiri niñgo semindimbo ra pipimayahä ranane ro pipi moendifemboyo-wami tüküyaheandühi wandi Godimbo anihondümbofe ra kikihari-hamindihi. <sup>8</sup>Hapoana napo pipambe horombofe hefe semindimbo ranai yanggori hifandarandi. Napo ranana ndahurai-ane. Adükari ai wambo mbumundi nindou mbüsümbui. Adükari ai mbumundi hohoanimimo süngu nindou yibobore arandi sapo ahandi adükari yibobofe si ra tükündifeyoani napo ra wambo ndendirimbui. Ai wambo yanggiriyoapani asendiri, nga nindou muñguambo didiyei ahambo weindahi tükündifiyuani hoeifimbo himboyeihi amarei ranaheimbo amboa.

### Timoti ai nimehünou Porimbo sowana mbüsünu-wamboane

<sup>9</sup>Se wambo sowana nimehünou sinimbo tiñirifondafi. <sup>10</sup>Demas ai hifihündi hohoanimimo süngufembo afindi hohoanimoyuhü wambo hiniñgireandiri haya Tesaronaika ngoafinambo mahu. Kresens ai Garasia hifina mahu asu Taitus ai Darmesia hifinambo mahu. <sup>11</sup>Asu Ruk mami yanggir-ani ro-dibo anüñgu, ranimbo-animbo dügüfihü Mak ndowarindifi dügüfi. Rananimbo ai wandi ratüpuri ra farihendiri haya ratüpurimbiyu-wamboane. <sup>12</sup>Iga Titikusimbo ana Efesusinambo koamarihöhina mahu.

<sup>13</sup>Asu se asühüfi ana, wandi ngisihari hoeari wari hoandari Troas ngoafihü Karpusindi worambe masiheheandi ra ndowandifi dügüfi, asu buk amboani kapeihi. Sapu buk ninihondi hoearinambo nafiyoweimbi-mayo ra.

<sup>14</sup>Areksander napo bras kapanambo nafira-randeimbi ai wambo afindi moaruwaimbo-mareandiri. Ranimbo-hünda süngunambo Adükari ai

simbori ahambo moaruwaimbo-mbirir-amboane. <sup>15</sup>Ŋga se-amboani nindou ranahambo-animbo hibadambo. Ŋga ai-ani yihoefi hoafi hifinambore arandi.

<sup>16</sup>Weaŋgurühi ro kotambe simbori hoafimayahi ra moai nindou didai-amboani farihendiri, ŋga muŋguambo nindou ai hiniŋgi-marihendiri. Ŋga God ai aheimbo amboawiyeyi mbeyahuamboane. <sup>17</sup>Asu Adükari ai ro-dibombo nünġumbo ŋginindi masendira ro aboedi hoafi ra Suda-yafe ndifo ranaheimbo didiboadondihe wataporimbo-ndihamboyahi. Raniyo God ai wambo nimambeahindi ninihondi raion yahamonindi hümarihendiri.<sup>a</sup> <sup>18</sup>Mami rani-sünġumboane Adükari ai wambo nindou moaruwaimbo-fembo hohoanimoyeyi ranambeahindi aboedambo-ndeandirimbui. Rananimbo ai sünambe ŋginindi hifandarandi ranambe aboedambo ndemündündiri gafumbui. Koadürümbo-koadürümbo ahambo aboed-ani mbisefimboane.

<sup>19</sup>Asu se wandi hihifi hoafi Prisira weimbo Akwirambo asu Onesiforusindi worambeahindi aheimbo hoafindafi. <sup>20</sup>Erastus ai Korin ŋgoafihü awi mbanüŋgu. Trofimus ai aŋgünimbomayua Muretus ŋgoafihü hiniŋgimarihini. <sup>21</sup>Asu se wambo sowanambo sifombo tiŋirifondafi ŋgisihari tüküfekoate-yoambe. Yuburus, Pudens, Rinus, Krodia asu muŋguambo anihondümbo-rihindeimbi ai sihambo hihifi hoafi koararihehinini.

<sup>22</sup>Adükari ai se-dibo mbinüŋgu-wamboane. Ŋga asu ahandi moani hipoambofe ai se-dibo mbeyanġoro-wamboane.

---

<sup>a</sup> 4:17 Nda kafoefe hoaf-ane. Raion ai nindou bidifiri mbura arandi. Kafoefe hoafi nimindi ra Porimbo tiŋirifo tükümeŋeyowa yifimbo yaŋgirimayu, ŋga God ai ahambo mafariheira aboedambomefiyu.